

Prumme ...

PETER DEMANT



dät luter möglichs unopfällig.

Prumme wor ne Höösch, ne Baas, sich unsichbar zo maache.

Prumme goov et eigentlich överhaup nit.

Grad em Augebleck dät Prumme sich unger de Warteschlang vör däm stadtbekannte Backhuus mische, sing suwiesu bloß 172 Zentimetre op Liliputformat schrumpfe, et Basekääpche noch e bessche deefe in sing Mondgesech trecke, trok an dä geföhlt zentnerschwer blau Ikea-Täsch. Dät dat Gepäckstöck zweschen de Schoche verschwinde loosse un däute et met lutter Kүүhme-rei zentimeterwies no vүүr. Do an de Thek hatt at widder ne Käufer tūntelig sing War gepack un de Nūsele en et Portemannee gefrickelt.

Prumme dät links linse, rähts luure, dät selvs no hinge piele durch de Panorameschieve, ohne wirklich de Kopp zo driehe. Drusse wor jet wie e Schmeersportfess am tobe. Tatütata, zuckend Blaulench, Motorräde däte knattere, Reife quietsche. Minsche in blaue Klamotte rannte schinns ohne Ziel eröm, däte us Streifewage titsche, widder erenn hechte.

Do hätt einer vūr ne halve Stund en Bank övverfalle, dät sich dä Klaaf verbreite. Mieh wie en halve Million. Mindestens. Absolute Profi.

„Prummetaat – Appeltaat – alles weed Zoldat gemaat,“ dät leis rāppe dä Härm met dä Base-Kapp, wie sie de Deile en Amerika nenne, die se beim Baseball op'm Kopp han, wenn se net grad schmieße oder schlage oder fange oder sich de Bein en de Liev stonn. Wat he keine Minsch spellt. Prumme wor total unmusikalisch wie de mietste Rappere, ävver – dä Rhythmus! E paar Zentimeter no vūrre rōtsche met dr Täsch en dr Schlang....

Oven dropp en dr Täsch log et Mett. Prumme dät tireck wie hä us de Bank kom, watt geplant wor: Ruude Adidastäsch en de nächs Mülltonn, blaugelve rustrecke. Kapp op dr Kopp und deev en et Gesech trecke. Un Mett en de Metzgerei koofe. Et Wassser wor em ald widder ens en de Muhl zosamme geloofe. Öllig hatt hä noch doheim, och Pfeffer un noch e bessche Salz als Krönung.

Domals, hä woss nit mieh wann genau, hatt hä zoersch en Kapp vom FC angehatt. Die hatt hä en ener Weetschaff an de Zöllecher Stroß vom Pluutehoke einfach metgenomme. Esu hatt hä bei de Gröne opgeschlage. Die wore alldemolde vom Ömverteile am schwaade. FC, hatte se ge-pröttelt, de Kapitalistesäu! Wollte em Gröngöödel et Geißbockheim usbaue! Un kein An-gerscheröm en de Mannschaff! He geht eckersch bloß en Sank-Pauli-Kapp! Ävver nix Ömverteilung! Em gove se suwiesu nūhs, keine Penning. Net ens ene Job in irgendein Behörd, Ministerium oder Verwaltung. Kein Macht, für die mr nūhs geliert han moht. Wie esu vell von denne Politiker un –inne.

Do moht hä selvs anpacke und fing dat Dinge met dä Banke an. De nächste Kapp wor ein von de Haie, obwohl hä sich för Eishockey gar nit interessiere dät. För Fußball und Baseball och nit.

Stoisch wor de Schlang sich em Schnecketempo no vūrre am schleiche, angetrocke vom betö-rende Döff von gebackene Kossbarkeite.

Prumme wor dran.

„Wat darf et dann sin, dä Här?“, dät e Persönche em weiße Kiddel fläute. „Net hetze, bin neu he' los Prumme irritiert op dām Häubche en den Hoor.

„Äj, eja, e Pund Schwatzbrud. Zehn Röggelcher de luxe. Un – en ganze Prummetaat. Met Rohm“, dät hä luusch ordere, leckte sich de Lippe und kaessierte övver dat proper gefüllte Ikea-Säckche.

Genau en dem Fupp dät ene Blaukiddel de Laade stürme. Sich met getrockene Waff dörch et Gewöhl kāmfe no vūrre vūr de Thek und blöke: „PRUMME! Endlich han ich dich, do Hanack!“

„Se sen gar nit dran! Freesigkeit!“ dät Ein met ener spetze Naas sabbele, trot dä Poli mit dem Birkenstock-bewaffnete Fuß widder et Schinnbein, rammte ene säbelschärpe Elleboge in sing Rebbe.



„Typisch Macho! Einfach vürdrängele und mir de letzte Prummetaat fottschnappe! Nit mit mir! Ich ben dran!“

Prumme dät op der Stell schalte. Dat Dörchenein notzend, dät hä de Prummetaat packe, se dem Uniformierte en de Visage klatsche und us däm Geschäft scheeße, esu flöck, wie et dr Ikea-Büggel zoleeß. Över däm Blaue wor ungerdesse en Well us en et Wanke gerodene Liever zosamme gebroche.

„Schudderhohn!“ brüllt dä eine. „Mömmesfresser!“ gov sei retour. „Freckig Freese!“ blöök dr eine. „Dönerdrießer!“ ne andere. „Dressühl!“ „Ahl Schabrack! Zuppehohn!“ „Fiese Möpp! Merkelgeseech!“ „Do kanns mir dr Nache deue!“ „Düs-sel-dor-fer!“ ging dä Knaatsch.

Dat Seniorepärche nevenan am Stammpplatzdesch tirek neven dr Thek hatt de Lusterhoonde op „Ovendfridde“ gestellt, wie se en dat Backes kome, und däte hinger Odem op de Szenerie met Argusdöppe un vürgereckte Häls lustere, esu wick wie de Brelleglasere reiche däte.

„Ävver gefälligs met Sahne“, juchzte de weibliche Hälvde von dem alääte Duo, et Drautche, en Art Trude Herr för Ärme, dät met vill Genuss ene neue Happe Prummetaat eravv schlecke un singe Rol-lator zielgenau en dä Tumult ramm. Ihre Plääte-Begleiter, dr Schäng, em Veedel och ‚Knubbelefut‘ genannt, dät nörgel: „Met Zimp un Zucker, do Tupples!“ und meddels singe Krücke met ener wohre Engelsmien en janze Herd von Chaosteilnehmer op de Fott falle losse. „Dat es wie fröher Dilledopp spelle.“

„Esu wohr wie ich Pinkus Schwutz heeße, dich zick 10 Johr jage und en drei Woche en Pension gonn: PRUMME, do bes dran! Hättste besser ding Mask net grad vür dr Metzgerei ustrecke dürfe, Fut-zemann,“ rief dr Poliziss hinger däm Flüchtige her un met vill Möh de Rohm zosamme met Taat aus Schnäuzer un Auge klaube.

Prumme dät, us dem Backes entkomme, widder betont höösch un unopfällig, en däm Dürch- enein von de Schmär kei Problem. Selvs bei ‚Aktenzeichen XY‘ woodt hä ‚Fantomas‘ genannt. Hä trok de Kopphörer övver alle zwei Uhre un trendelt met enem fruhe Leedche op de Leppe elans de Sülz-burgstroß.

Hätt jo ald widder ens geflupp. Äver Dunnerknispel, gribbelte hä, woröm hät dä Bankfuzzi zosätzlich zo dä Schingche noch Münzrolle eren gepack? Hatt hä doch für singe wirklich allerletzte Ömverdeiler, esu nannt hä sing Raubzög, ald de Strategie gewechselt. Sing Leevlingsbank wor de Sparda. Die Lumpe hatten en övver de Uhre gehaue met dr Hypothek för dr grüße Wohnwage. Drei Zemmer, Köch, Bad, Balkon. Stond em Sibbegebirg. Als Nächste wor de Deutsche dran. Von wäge Peanuts. De Bin-Laden-Mask hatt johrelang Entsetze, Schess und Schrecks verbreidt, bes singe Aanbleck bei einer Huh-Schwangere spontan Wihe usgelüüs hat. It fing an, wie am Spieß zo blöke, wodrop hin die resssliche Wiever en dat Kreischkonzäät enstemme däte, alledwil dä Lihrlung em Glaskaste en Ohn-maach feel.

Beim vürletzte ‚Ömverdeiler‘ wor hä dann met ene Andrea-Nahles-Mask komplett op et Föttche gefalle. Wie se dä fett grinsende Quadratheenskaste soche, hatten Bänker wie Kunde sich halv kapodd gelaach un en met Spröch wie „He gitt et blooß Mindesluhn! Schnapp dr doch de Rent met 23!“ jejujax, dä Stoppe derart verunsechert, dat hä op dr Stell ald widder Rießus genomme hatt. Wie hatt hä och blooß op dat Zuppehohn komme künne? Dr verhinderte Baalmillionär hatt wochelang Prummetaat bloß schnäuse künne und durch de Finsterschiev genieße mösse. Wegen dä Fählslägg kunnt hä sich esu jet nit leiste.

Lang hatt hä geschwank. Wor en de SPD gegange. Als Martin Schulz verkleid. Dä dät en irgendwie



an ein Figur us em Kölsche Hännische erinnere. De komische Brill, de usselige Bart und de halve Pläät. Der geborene Prediger vun de soziale Gerechtigkeit. Dat wor se neu Idol: En et Europa-Parlament flitze, en de List eintrage, widder avvhaue, Sitzungsgeld für dr ganze Dag kassiere. Ich han en dr Schull och nix geliert. Op ich Bürgermeister von Würsele werde kann? hat hä de Genosse gefrog. Die hatte vielleicht geluurt!

Hüggig deute de Hartgeldrolle op en Joschka-Fischer-Mask zosamme met dä zopasse Pistol Marke Glock, maht ävver et Wiggerkumme en Plog. Esu muss sich dr Zintekloos ohne Rendiere föhle, stöhnte hä. Egal, dr Fluchtplan wor klor. En dr gelvblaue Ikeatäsch hat hä noch en eröm gedrihte schwazze.. No'm Nippes konnt hä für et ierste nit mieh, ävver zom propere Campingmobil em Sibbegebirg. Wo keine froge dät, wer mr wor oder woher mr kohm. Do kannte se bloß dr Mänes Schmitz us Quadrath-Ichendörp. Keiner wöod ein Rheinland-Palz no em sööke.

Dat es dr Rhythmus - wo jeder met moss! dät hä rappe. Em Zickzack hoppelte et Mannsbild met dä jetz schwazze Täsch lanz et Trottoir, quer üvver drei Spure Luxemburger Stroß, öm e Fitzelche grad noch eran scheeßende Autos us em Wäg gegange. No'm Hauptbahnhof, do stond sing Kaar unger dr ‚Milchtüt‘. Alles genau geplant.

Am Kühme, wuchtete hä dat Gerät övver de Brüstung von de Bahnstreck un wood wie von selvs hingerher getrocke. Op singem Mp3-Player gove grad AC/DC ihr Bess: „Highway to Hell“, op Kölsch „A3 noh Düss...“.

De eranbrausende Bahn nohm Prumme genau esu winnig wohr wie esu manch eine jonge Stromer em Studenteveedel.

„Pietät hin, Pietät her“, nostert dr Gerichtsmediziner en geschlagene Stund später, „dat sieht us wie ... Prummetaat!“